

各位敬愛 ê 會員逐家好：

「台灣語文學會」tī1991年8月17日成立，到 ta<sup>n</sup> 已經 28 冬，是咱台灣上有歷史 ê 台灣語言專業團體。咱學會成立 ê 目的是積極促進台灣語言 ê 研究 kah 教學，為咱台灣語言得著氣力、復興閣活力來拍拼。

咱學會第十三屆理監事已經任滿，感謝各位理監事 kah 會員 ê 支持 kah 協助，特別是陳麗君秘書長 ê 付出。學會 tī 十月舉辦國際研討會，同時辦理會員大會，tī 大會中，咱選出第十四屆 ê 常務理事 kah 常務監事，中央研究院江敏華研究員眾望所歸被推選做會長，伊請徐富美教授擔任秘書長。江會長 bat 擔任過學會 ê 秘書長 kah 期刊執行編輯，經驗豐富、認真負責，相信 tī 伊 ê 帶領下，咱 ê 會務會有真好 ê 發展。另外一個好消息是咱學會 ê 期刊《台灣語文研究》通過審查，繼續成做核心期刊。感謝主編王旭教授，執行編輯葉美利教授 kah 王本瑛教授負責期刊 ê 編輯空課，in 骨力拍拼提升咱期刊 ê 品質。《台灣語文研究》隨到隨審，歡迎會員投稿。

過去兩年，學會繼續過去推廣台灣語言 ê 研究 kah 教學 ê 慣例，有辦理「台灣語言學大師一日講座」，感謝陳淑娟教授、吳中杰教授主辦；「第五屆青年學者台灣語言學術研討會」，感謝楊允言教授主辦；「第十二屆台灣語言及其教學國際學術研討會」，感謝杜佳倫教授主辦。這擺 ê 國際研討會，tī 黃美金 kah 杜佳倫教授 ê 協助之下，順利將 Zuckermann 教授演講 ê 摘要翻譯做 14 種原住民族語，加上台語、客語、華語 kah 英語攏總有 18 種語言。透過多種語言 ê 譯本，希望會當呈現咱台灣是一個語言多樣 ê 美麗島，同時嘛表示語言平等尊嚴。

台灣語文學會關心台灣語言 ê 流失狀況，閣積極從事台灣語言復振 ê 研究 kah 實踐，來保存台灣語言 ê 多樣性。「第十二屆台灣語言及其教學國際學術研討會」ê 主題，著是「台灣語言 ê 多樣性 kah 永續發展」。真抵好，今年 2018 年聯合國 ê 世界母語日主題是「保持語言多樣性並促進使用多種語言來支持會當永續發展 ê 目標」。聯合國講母語是優質教育 ê 前提要件，對提升學習效果，發展自尊自信有真大 ê 作用，嘛是咱追求永續發展通重要 ê 火車頭。

咱學會 tī 台灣本土實踐普世關心 ê 語言復興 kah 重視語言多樣性 kah 語言人權 ê 主張。復興語言需要進行語言學研究，當作後續語言復興 ê 語文基礎，同時嘛需要佇家庭、社區 kah 學校進行母語教學，創造母語使用環境，同時提升母語使用 ê 動機。

咱學會關心台灣語言復興，希望會當強化台灣族群認同，維繫族群文化，促進族群語言永續發展。咱逐家做伙打拼，共同為台灣語言出頭天，貢獻心力！

台灣語文學會第十三屆會長 張學謙敬上

2018 年 12 月 23 日